

# La catedrala da Cuira – puspè sco quai ch'ella ha dad esser

Reconsecraziun da la baselgia-mamma da la diocesa suenter restauraziun reussida

■ (anr/gc) **Suenter set onns da planisaziun e restauraziun vegn la catedrala da Cuira reconsecrada dumengia proxima en il rom d'in servetsch divin sut l'egida dad uvestg Vitus Huonder, assistì da l'uestg emerità Amédée Grab.** Quai munta il punct final da la pli gronda restauraziun dal sanctuari en sia istorgia da 700 onns. L'edifizi sacral principal da l'uestgieu da Cuira, che cumpliglia 700 000 catolicAs en set chantuns – è in dals pli impurtants edifizis culturals da la Svizra. Ils custs da 23 milliuns èn vegnids curclads tras agens meds sco era cun donaziuns da circuls ecclesiastics e privats. La festività da reconsecraziun vegn emessa directamain da la televisiun svizra.

Ins è – sco sur canoni *Christoph Ca-*

*setti*, vicepresidente da la Fundaziun da la catedrala e manader da project – ha constatà tar l'orientaziun da las medias, fitg satisfatg da la restauraziun e ch'ins ha pudì tegnair en tant il temp sco il budget previs. Ils 27 d.q. datti ina festa per la plaiv da Cuira, in di suenter la collaudaziun da la nova orgla e pli tard dis da las portas avertas per ils chantuns diocesans.

## Fatg vesavel sco igl era

*Georg Mörsch*, parsura da la cumissiun speziala, ha constatà che la restauraziun da la catedrala saja reussida. Ins haja puspè fatg tut vesavel sco igl era oriundamain. Durant l'entir temp da restauraziun saja vegni fatg mintga di messa en la catedrala. I haja mai dà tsiens tran-

ter ils represchentants da la liturgia e quels da la tgira da monuments. I saja vegni resguardà quai ch'è vegni fatg ed uschia rendi a la catedrala sia vaira aura da monument.

## Da l'idea a la realisaziun

Ils dus architects, *Rudolf Fontana* e *partenaris, Domat, e Gioni Signorell*, Cuira, han furmà ina cuminanza da lavur suenter avair survegnì ina zunt interessanta incarica, stada era ina gronda sfida. La restauraziun è sa fatga en trais etappas. Entschavi han ins 2001 cun l'altar grond. La segunda è stada 2003 ed ha pertutgà la catedrala sco tala. Dapi 2005 èn las lavurs da la 2. e 3. etappa suandadas. 85 firmas èn stadas involvadas.

Decisivs sajan stads aspects dal cuntegn e l'acceptaziun da la substanza istorica – tant tar la renovaziun externa sco l'interna. Novs è il spazi da l'altar ed ils gronds stgazis l'altar entaglià si en il chor e l'orgla nova. Ins ha adattà quai tut als novs basegns funcziunals.

## Sa gidà bain tar la finanziaziun

Sco quai che sur canoni *Christoph Casetti* ha detg, è la calculaziun da custs cun 22 milliuns (plus/minus 15 pertschient) stada realistica. La fundaziun da la catedrala cun il chapitel catedral e la mensa episcopalis han dà 3 milliuns, il Grischun la medema summa e la confederaziun 2,8 milliuns francs. La citad e la plaiv catolica da Cuira han contribuì 3 milliuns. Quai dat la mesadad. Il rest han ins survegnì da sponsurs. Fundaziuns han spendì 3,5 milliuns, las baselgias chantunalas 2,5 milliuns, ils chantuns diocesans 0,5 milliuns, plaivs e vischnancas politicas 1,3 milliuns ed interpresas 2,2 milliuns: las Ovras da Domat han finanzia l'orgla cun 1,6 milliuns, la Banca

chantunala grischuna ha dà 0,5 milliuns e persunas privatas 1,3 milliuns (da 10 – 50 000 francs). La summa sponsurata

ha muntà a 12,6 milliuns. Suenter avair pajà tut restan anc 1,6 milliuns per restauraziuns futuras.



L'organist Hansjörg Fischer suna sin l'orgla nova.



Nov ambo ed altar.